

TINTFO LEBETINGESINJALO

KUSUKELA EKUCALENI

¶ ...kwetinsuku taKhe, afundzisa tintfo lebetingesinjalo. Ngicabanga kutsi uma Bekangefika namuhla, Bekayotfolia intfo lefanako: tintfo lebetingesinjalo kusukela ekucaleni. Uma njalo ufunwa kwati kutsi yini lokuliciniso, buyela emuva ekucaleni. Buyela emuva kuGenesisi, futsi ungatsatsa yonkhe inkholoze nalolonkhe liciniso kusukela namuhla. Nje... Tihlahla tonkhe ticala kuGenesisi, ngoba Genesisi usahluko sembewu seliBhayibheli. Futsi uma sifuna kwati kutsi ngukuphi lokulungile, sibuyele emuva kusukela ekucaleni.

² Njengoba bengitama kusho itolo kusihlwa, lapho Nkulunkulu wake wenta sitatimende, futsi angeke ahluke kuleso sitatimende. Ufanele asigcine indlela yonkhe. Loko Lakusho kuGenesisi kuyintfo lefanako eSambulweni, futsi kuyo yonkhe indlela. UnguNkulunkulu, futsi nguloko kuphela. Niyabona na? Nawo onkhe ema Vi aKhe acinisile.

³ Manje, sitfola kutsi ngesikhatsi Jesu efika, Watfola bothishela lebebatsetse Livi laNkulunkulu futsi bebaLiphendvuketetele ekhatsi, kutsi lifanelane nabo. Bebayitsetse imiyalo yaNkulunkulu futsi baYiphendvuketela yaba sivumokholo.

⁴ Manje, khumbulani, kunamunye kuphela uMdali, nako konkhe... Sathane akasuye umdali. Yini *sono* na? *Sono* ku “kungalungi,” futsi *kungakalungi* ku “kulunga kuphendvuketelwe.”

⁵ Mhlawumbe ngitawukwenta kucace kahle. Baba... Nilibandla lelihangene. Lalelani dokotela wenu; mine ngingumnakenu. Ngoba indvodza kutsi ihlale nemkayo kukulunga. Washada naye. Sento lesifanako nalomunye wesifazane kufa. Lomunye uletsa kuphila, lolomunye kufa. Niyabona na? *Kungalungi* ku “kulunga kuphendvuketelwe.” Yini *emanga?* Ku “liciniso leliguculewe.”

⁶ Ngako nguloko Jesu lakutfola. Futsi loko sonkhe lesitongena kuko, kuphela nje uma sitsatsa futsi sengete, noma sisuse eVini laNkulunkulu, kuphendvuketela Livi laNkulunkulu.

⁷ Ngako ngesikhatsi kufika Jesu, Watfola kutsi bebatsetse Livi laNkulunkulu futsi baLiphendvuketela, wase wenta lisiko lemuntfu. Futsi Watsi, “Kungani wena wenta ngekwakho kwe... ugucula Livi laNkulunkulu na?” Ngekutsatsa emasiko abo, futsi bagucule Livi laNkulunkulu, kuLenta lisho intfo letsite impela leLingayishongo.

⁸ Sitfola kutsi Wakutfola loko elusukwini lwaKhe, futsi Bekatokutfola lapha namuhla. Futsi naye, eBukhoneni, noma, kuLomuntfu waMoya loyiNgcwele, loNkulunkulu lofanako lobekavele akhona, ahlala kubantfu baKhe ngesimo saMoya loyiNgcwele, ufkaza ngelikhola leliciniso, lowomuntfu uphendvuketela Livi laNkulunkulu kutsi sifanelane nesivumokholo sabo, esikhundleni sekwenta sivumokholo sabo sifanelane neLivi laNkulunkulu.

⁹ Ngifuna umuntfu longatfola siVumokholo seBapostoli eBhayibhelini, njengoba besingakusho namuhla, "Ngiyakholelwa ebandleni leRoma leNgcwele leyiKhatolika, budlelwane nalabangcwele labangasekho." Nomayini lenebudlelwano nalabafile kukukhonta imimoya yalabafa. "Munye kuphela uMlamuli emkhatsini waNkulunkulu nebantfu, uMuntfu Khristu Jesu." Nguloko kuphela. Akekho lomunye umlamuli. Ngako nomayini...Baphendvuketela tintfo, benta siVumokholo sebaPhostoli.

¹⁰ Uma umphostoli bekananoma ngusiphi sivumokholo, kwakuteNto 2:38. Be—beka...ngiko lebebakushumayela ngasosonkhe sikhatsi futsi—futsi bangcongcodzela kulabantu. Bafanele baphendvuke baye kuNkulunkulu nakanjalonjalo. Loko utsi, uma kukhona nasinye sivumokholo eBhayibhelini, loko bekungaba ngiko, baphostoli labakusebentisa.

¹¹ Ngako ba...konkhe kuhola kwabo kwaMoya loyiNgcwele kwahlala neLivi. Futsi uma noma ngumuphi umuntfu, noma ingelosi, ake asho nomayini lephambene neLivi, baseGalathiya 1:8 batsi, "Ayibe ngulecalekisiwe." Kufanele kube Livi laNkulunkulu.

¹² Pawula watsi, "Uma kubanengelosi levela eZulwini ifika kini nanoma nguliphi leliney livangeli kunaloko lesenivele nikuvile, ayibe ngulecalekisiwe." Ngako sikhola kutsi emazulu nemhlaba kutawendlula, kodvwa Livi laNkulunkulu lingekte lendlule, ngoba Livi linguNkulunkulu. Nkulunkulu akendluli. Indalo itowendlula, kodvwa Nkulunkulu angeke endlule.

¹³ Akukho ndzawo yemahlaya, lipulpiti alisiyo indzawo yemahlaya. Ngicabanga kutsi Livi laNkulunkulu lifanele lishunyayelwe kusukela lapha ngebuotsa be—benhlitiyo, futsi sifanele sikukhumbule. Kodvwa kusho loko nje, kwenta lelipuzu, lomdzala lonsundvu, lapha ndzawanatsi eNingizimu, ngalesinye sikhatsi wakwenta sitatimende, watsi, "Angamane eme eVini laNkulunkulu kunekutsi eme eZulwini." Bambuta kutsi kungani. Watsi, "Ngoba kokubili liZulu nemhlaba kutawendlula, kodvwa Livi laNkulunkulu lingekte." Kunjalo. Sifanele sihlale eVini.

¹⁴ Jesu, ngesikhatsi Efika, Watsi, "Mosi ngenca yebulukhuni benhlitiyo yenu wanivumela kutsi udivose nemkakho: kodvwa kwakungesinjalo kusukela ekucaleni." Manje, sitfola kutsi

batsatsa imiyalo yaNkulunkulu futsi bayenta yangabi namsebenti.

¹⁵ Ngesikhatsi Jesu efika, Watfola bantfu babuka libandla lensindziso. Batfolani na? Tivumokholo; lihlelo ngalinye litentela sivumokholo salo lucobo. Futsi-ke nguloko Latfola bantfu bancike ebandleni ngensindziso; futsi batfola tivumokholo letentiwe ngumunfu.

¹⁶ Futsi uma Efika namuhla anguMuntfu futsi wakhulumna natsi, Bekayotfola intfo lefanako: umunfu wenta Livi laNkulunkulu lifanele lihlelo labo, abanika tivumokholo. Futsi kute insindziso kusivumokho, uma kungesilo liBhayibheli. Kufanele kube liBhayibheli, ngoba Livi laKhe li...konkhe lesikudzingako, Livi laKhe. Futsi Livi laKhe, uma ALivi, Livi laNkulunkulu linguNkulunkulu. Nguloko kuphela. LiLivi laKhe, cobe lwaKhe. Ungu...“Ekucaleni bekakhona Livi, naLivi bekakuNkulunkulu, naLivi bekanguNkulunkulu.” Futsi Livi lisasolo linguNkulunkulu. Lisasolo linguNkulunkulu.

¹⁷ Manje, sitfola kutsi uma Efika, Watfola emadvodza, ke, atsatsa imiyalo yaNkulunkulu futsi ayenta ingabi namsebenti, ngekutsatsa imiyalo yaNkulunkulu, futsi bayigucule itolungela sivumokholo sabo, kute ingabi namsebenti. Nelibandla labuka... Bantfu babuka ebandleni esikhundleni sekubuka eVini laNkulunkulu. Ngako ngako-ke, Watsi, “Kwakungesinjalo kusukela ekucaleni.”

¹⁸ Sikutfola kufana namuhla, njengoba ngicaphunile kabilanoma katsatfu manje ekuseni, futsi ngibukisise lelowashi, kungenta ngibe neluvalo, ngako ngi—ngifuna kusho loku noko, kutsi, “Loku kuliciniso.” Bese kutsi ngalolosuku njengoba kunjalo manje, futsi manje njengoba kwakunjalo ngelesosikhatsi, bampongolota batsi, “Uphi Nkulunkulu na?”

¹⁹ Yebo-ke, yona kanye lentfo, kutsi, bashiye Nkulunkulu ngesikhatsi bashiya Livi laKhe. Kungalesosizatfu sinetintfo ngendlela lesenta ngayo namuhla, kungoba bantfu bashiya Livi laNkulunkulu.

²⁰ Uma dokotela abhale indlela yekwenta, luhla lwemitsi nekusetjentiswa kwawo, futsi wengete lokutsite kuko, noma ususe lokunye kuko, bewutosibulala sigulane sakho. Kunjalo. Ufanele ukugcine ngendlela nje lokubhalwe ngayo. Kunemjovo lowenele kubulala lophoyizeni, phoyizeni lowenele kutsi abulale leligciwane. Futsi phoyizeni lomnengi kuwo ngaphandle kwelikhambi kungabulala lesigulane; futsi—futsi likhambi lelinengi ngaphandle kwaphoyizeni, lingentani na? Belingeke lisitise sigulane sakho. Ngako ufanele ukugcine kunjalo.

²¹ Futsi nguleyondlela Livi laNkulunkulu lelingiyo. Liluhla lwemutsi nekusetjentiswa kwawo lwaNkulunkulu. Yebo, mnaketfu. Kuluhla lwemutsi nekusetjentiswa kwawo lwaNkulunkulu kubantfu baKhe kwelapha konkhe kugula,

tonkhe tifo. Sono nekwemtimba, noma kungaba yini, konkhe kuLangabetwane naso eVini laNkulunkulu. Amen. Livi laNkulunkulu. Lalinalo ekucaleni; Lalinalo nasemnyakeni losemkhatsini; Linjalo kuwowonkhe umnyaka; futsi Linjalo manje ekuseni, ngalokufanako nje njengoba Lalinalo ngesikhatsi ALikhuluma, ngoba Lingeke liphambuke nakancane, ngoba LiLivi LaNkulunkulu.

²² Khona-ke bantfu namuhla, akumangalisi bamemeta: "Tinsuku temimangaliso selwendlulile. Ayikho intfo letsiba kophilisa kwaNkulunkulu." Bakwentelani na? Ngoba batsetse Livi laNkulunkulu base benta sivumokholo sabo lesigocotwe kuso, futsi bayihlanganise kabi lentfo. Futsi abanamandla ekhatsi lapho. Uma ingelosi, umbhishobhi, umbhishobhi lomkhulu, noma kungaba yini, efike futsi antjintje Livi linye, kutontjintja loLuhla lwemutsi nekusetjentiswa kwavo. Asihlale kanjalo njengoba Lishito. Loko Nkulunkulu lakusho, asiLiyekele kanjalo.

²³ Emabandla aphelile namuhla. Baphambukele ekuhlanhlatsekeni ndzawanatsite, benta tinhlangano, bente emahlelo, kuletsa bantfu balandzele tivumokholo esikhundleni sekulandzela Khristu. Angifuni sivumokholo kuphela Khristu, akukho mtsetfo kuphela lutsando, futsi akukho ncwadzi kuphela liBhayibheli. Nguloko impela lesinako: siVumokholo saNkulunkulu, Luhla lwemutsi nekusetjentiswa kwavo lwaNkulunkulu. NguMjovo waNkulunkulu wesono. NguMjovo waNkulunkulu wekophilisa kwetfu, futsi Li—Lingemandla aNkulunkulu labonakaliswa kitsi, njengoba sitsatsa Livi etimpilweni tetfu.

²⁴ Manje, sitfola kutsi bayaphendvula, bampongolote babuye, "Uphi Nkulunkulu waMosi?" Sizatfu sekutsi Mosi ahiale naNkulunkulu netintfo kwakukutsi, Nkulunkulu bekalandzela umyalo weluhla lwemutsi nekusetjentiswa kwavo waMosi, Mosi bekalandzela Livi laNkulunkulu. Indlela Phetro, Jakobe, naJohane labashaya imaki ngaso sonkhe sikhatsi, ngenca yekutsi ba—balandzela Livi.

²⁵ Lapha esikhatsini lesitsite lesendlulile... Wonkhe umuntfu uyati kutsi ngiyayitsanda inkoyoyo, futsi ngidubula, nakanjalonjalo. Futsi bengineluhlobo lweModeli 70 Winchester lencane. Ngema ngephandle, futsi emayadini langemashumi lasihlanu, enkoyoyweni yekudubula, ngadubula tinhlavu letisiphohlongo tendlula embotjeni lefanako, emayadini langemashumi lasihlanu. Futsi kwaphuma kancane, kwadubula. Ufanele udlale ngako futsi ukugwedlelete. Futsi ngiyatsanda kwenta loko, ngitsi nje kuthulisa imizwa yami. Futsi loko kwaphuma. Angikhonanga kukwenta kutsi kungene. Bengicabanga kutsi sidzinga kulungiswa.

²⁶ Ngasitfumela emuva eNkapaneni iWinchester. Baphendvula, base batsi, “O, Mnaketfu Branham, noma, Mnumz. Branham,” batsi, “uma...leyo Winchester ingulesinye saletikahle kakhulu kunatotonkhe.” Watsi, “Kuyohlangana ngeli-intji emayadini langemashumi lasihlanu, emayadini langemashumi lamabili nesihlanu, ngicondze kutsi, li-intji ngemayadi langemashumi lamabili nesihlanu.” Watsi, “Loko kuhle kwendlula konkhe loyoke ukutfole.”

²⁷ Ngangati lokwehlukile. Bengati ngemayadi langemashumi lasihlanu ngadubula tipikili letinenhloko lenkhulu letisiphohlongo leticondzile ngaso. Ngako ngati kutsi loko kwakuliphutsa. Manje, nguleyondlela... Futsi angikhonanga kuphumula ngaze ngasibuyisela emuva. Manje, sitokwenta intfo lefanako.

²⁸ Manje, angisuye lomunye walabantfu laba lotsandza kushaya futsi asakate, “Libandla lisho njalo, ngako asihlale nako nje.” Uma baphostoli, ngeLivi laNkulunkulu, ngemiyalo yaNkulunkulu, ngaMoya loNgcwele lofanako lesinawo, badubula tipikili letinenhloko lenkhulu taya ekuphilisweni kwebuNkulunkulu, emandleni aNkulunkulu, uma sitohlala nalo, siyati kutsi kunjalo lapho, ngako hلالانى site sicondze ngco ekhatsi, nguloko kuphela, ngoba siyati kwake kwakwenta kanye.

²⁹ Kunjani, “tinsuku temimangaliso setendlulile,” na “Jesus Christ longuye itolo, namuhla, naphakadze na”? Kungenteka kanjani kutsi loyoNkulunkulu afile kutsi aphindze avuswe, futsi uyaphila phakadze na? Singakwenta kanjani kusivumokholo, ngesikhatsi Nkulunkulu angenasivumokholo na?

³⁰ Nkulunkulu unguMuntfu. Nkulunkulu uhlala ngekhatsi kweliBandla laKhe, futsi wena uliBandla laKhe. Uma watalwa kabusha, futsi wagcwaliswa ngaMoya loNgcwele, uliBandla laNkulunkulu. Nkulunkulu uhlala kulakho... Uhlala kulelidvokodvo kanye nawe. Ngesikhatsi Nkulunkulu ehla, waba yinyama wakha emkhatsini wetfu, Wentani na? We—Wendlala lithende laKhe emkhatsini wesidalwa lesingumuntfu. Wa—washiya sigaba Sakhe kusuka kuNkulunkulu waba ngumuntfu kutsi abe, kutsi umuntfu angaba njeNgaye. O, Uba ngimi, kute kutsi ngemusa waKhe ngibe nguYe.

³¹ O, intfo lenkhulu kanje pho. Singeke sakucondza kutsi kwakuyini. Akumangalisi bantfu babitela ngephandle namuhla, “Up hi Nkulunkulu na?” Buyelani emuva eVini. Buyelani ekucaleni.

³² Ekucaleni Watsi kubafundzi baKhe, “Hambani niye emhlabeni wonkhe, futsi nishumayele liVangeli. Letibonakaliso leti tiyobalandzela labakholwako” Kwaba nguloko-ke. Buyelani emuva kuleloLivi lelifanako futsi Liyoveta intfo lefanako. Balandzela leloLivi, futsi Lacondza ngco ekhatsi futsi

ladubula tipikili letinenhloko lenkhulu. Sonkhe sipikili, tonkhe tetsembiso Nkulunkulu latenta, sabonakaliswa.

³³ Uma sitobuyela kuleloLivi lelifanako, Lidubula tipikili letinenhloko lenkhulu letifanako, lente imimangaliso lefanako, lente tintfo letifanako, lente imphilo lefanako, lente sidalwa lesifanako, livuse labafile, liphilise labagulako, likhiphe bodeveli, libone imibono, tiprofetho. LiVangeli lelifanako leladubula sipikili lesinenhloko lenkhulu ngalesosikhatsi, uma sitobuyela kulokufanako.

³⁴ Njengekutsi, sibuyisele sibhamu esimeni lesifanako lesasikuso endzaweni yekucala, lokuzizitela konkhe kuphuma kuso, kutobeka lenhlavu icondze ngco. Futsi uma sitfola konkhe kuzizitela kweungakholwa kuphume kitsi, Livi laNkulunkulu liyocondza ngco nje njengoba lalinjalo ekucaleni kwekucala. Kunjalo impela. Kuyocondza ngasosonkhe sikhatsi. Kwenterjalo kanye; Kutokwenta futsi. Unganeliseki ngesivumokholo noma lokutsite. Hlala khona lapho kuze kucondziswe Livi ngco.

³⁵ Kungikhumbuta ngesikhatsi lapho make nababe, noma, babe longatali iNkhosi yetfu Jesu bekaMtsetse wamenyusela emkhosini wePhentekhostal. Futsi bahamba luhambo lwetinsuku letintsatfu, futsi—futsi ekugcineni baphutselwa nguYe. Be—bebangakhoni kuMtfola.

³⁶ Libandla selihambe ngaleyondlela manje. Selihambe kakhulu...selihambe cishe iminyaka letinkhulungwane letimbili, futsi laphutselwa nguye. Naku ke. Kukhona tibonakaliso ndzawo tonkhe kubonakala kwekuBuya kwaKhe, futsi batsi, “Uphi Nkulunkulu na? Uphi Nkulunkulu na? Kwentekeni kuYe na?”

³⁷ Nike nacaphela? Mariya naJosefa baMfunisia emkhatsini wetihlobo tabo, kodvwa abaMtfolanga. Namuhla sibuyela emuva kubona kutsi emaMethodisti aMtfolile yini, emaBaptisti unaYe, emaPresbyterian, noma emaLuthela. Cha, mnumzane, abaMtfolanga. Kanjalo futsi angeke size siMtfole natsi namuhla. Akunandzaba kutsi sitama kangakanani kubuyela emuva futsi sisuselele lelinye lalawo lamadzala, emahlelo lafile, angeke sikhwente.

³⁸ BaMfolaphi na? Lapho baMshiya khona. Haleluya! Ngicabanga kutsi ngingumgiciki longcwele; ngiyacabanga nginguye. NitoMtfola njengoba benta nje: lapho baMshiya khona. Lapho baMshiya khona, ngulapho la baMtfola khona. Kulapho la libandla litoMtfola khona.

³⁹ BaMshiyaphi na? Emkhosini wePhentekhostali. LitoMtfolaphi libandla na? Emuva emkhosini wePhentekhostali, lapho baMshiya khona ngesikhatsi badvonsa basuka emfundzisweni yebaphostoli nakanjalonjalo. Emuva kuleyominyaka yasekucaleni emuva lapho, badvonsa basuka kuko base babumba tivumokholo tabo lucobo, futsi yacala

imfundziso yebuNikhola, yenta libandla leKhatolika, wahlela inkholo ya—yaloko lokubitwa ngenkholo yebuKhristu. Futsi kusukela lapho bahlelile, futsi bephula tintfo, futsi baletsa onkhe emaKhristu etivumokholweni, nakanjalonjalo, futsi wakuhlanganisa konkhe kwaze kwaba sibumbatsa lesifanako nje Lasitfola ngesikhatsi Efika. Kunjalo impela.

⁴⁰ Emuva ekucaleni lapho siMshiye khona, ngesikhatsi Anemandla, ngesikhatsi Avusa labafile, futsi waphilisa labagulako, futsi wakhipha emadimoni; loko kusemuva ngco ekucaleni, lapho siMshiye khona.

⁴¹ Batsi, “Ukuphi Yena na? Ngabe UneMethodisti na? Ngabe unemBhaptisti na?” Noma ngisho, “Ngabe Unayo yini iPhentekhostali na?” Cha, mnumzane. Buyela emuva e-ori... hhayi inhlango yePhentekhostali, lihlelo lePhentekhostali, lelo ligama. Ngubani longahlela iPhentekhosti na? Ngitjele. IPhentekhosti ayisiyo inhlango. IPhentekhosti sentakalo kunoma nguliphi likholwa lelifuna kulemukela. Kubuyela kulololwati, hhayi kubuyela emuva ehlelweni, kodywa emuva elwatini. IPhentekhosti ilwati.

⁴² Ake nginitjele lokutsite. Bukani sitselo semabandla emaPhentekhostali lasatalako namuhla, nitotfola kutsi abakacali kusukela ekucaleni: kuphikisana, kuhhwilitisana, kulwisana, kubheke phansi, kudvonsela *kuloku*, nekudvonsela *kulokwa*. Jesu watsi kuJohane we 14, noma Johane 15, “Mine ningumVini, nine ningemagala.” Ngabe kunjalo na?

⁴³ Manje, nine balimi, nine baseTexas, baseLouisiana, futsi nomangubani-ungahle-ube-lapha, noma ngumuphi lonemcondvo lobhadlile, lowake wawubona umvini ukhula, uyati kutsi umvini awutseli sitselo. Emagala emvini nguloko lokutsela sitselo, kodywa litfola kuphila kwalo emvinini. Jesu ungumtfombo wetfu wekuPhila. Yebo, mnumzane. Manje, sitocaphela, ke, uma Jesu angumtfombo wekuPhila kwetfu, khona-ke UngumVini weliciniso. Kona kanye nje lokuphila lokusemvini kusegaleni. Futsi uma lowomvini uveta ligala lekucala, nalelogala linjalo, sicuku semagilebisi sivela kulo, uma like laveta lelinye ligala, liyoba sicuku semagilebisi. Liyoveta lelinye ligala, liyokuba sicuku semagilebisi. Futsi kuyoba luhlobo lolufanako lweligala leliya ekupheleni kwemvini. O Nkulunkulu.

Manje ngidzinga ihhafu yeli-awa lami; nje ngilungela kulishaya. Amen.

⁴⁴ Sonkhe sikhatsi uma lowomvini uveta ligala, liyoba njengeligala lekucala. Ngani na? Ngoba lokuphila lokusemvini kuyoveta luhlobo lolufanako lweligala. Uma umvini wekucala uletse emagilebisi, lolandzelako ungeke utsele ematsanga. Lolandzelako ngeke utsele sitselo semawolintji. Bese-ke, emvakwesikhashana, kwehle njalo kanjalo, kungeke kukwente.

⁴⁵ Uma uMvini weliciniso uveta ligala, futsi uma... Jesu uliGala ekucaleni, noma, ungumVini. Neligala lekucala lelaveta, babbala iNcwadzi yeTento emvakwalo. Ngabe kunjalo na? Libandla lePhentekhostali, libandla sibili lePentecostali, futsi labhala iNcwadzi yeTento, ngetibonakaliso netimanga tilandzela likholwa. Uma lowo Mvini weliciniso sibili uveta lelinye ligala leliciniso, bayobhala incwadzi yeTento emvakwalo. Yebo, minumzane.

⁴⁶ Lapha e-Arizona kungesiko kadzeni, ngangibuka sihlahla ebeleni lendvodza: sihlahla semawolintji. Lalinetinhlobo letiyimfica letehlukene tesitselo esihlahleni sinye. Kwakungito. Tonkhe sasisitselo lesehlukile. Kwakusihlahla semawolintji kwekucala nje, kodvwa sasinema-phomegranathi; sasine—sasinemalamula; sasinemagrepfruthi; lonkhe luhlobo lolwehlukile lwesitselo seluhlobo lwemawolintji. Ngani na? Betifakelwe ekhatsi lapho. Betiphila ngekuphila kwalesosihlahla, kodvwa betingakhoni kutsela lutfo ngaphandle kwaloko lebetingiko. Betingeke tiletse emawolintji, ngoba tingumvini lofakelwe. Kodvwa sonkhe sikhatsi uma lesosihlahla siveta ligala leliciniso kuso lucobo, kwakusihlahla semawolintji, nemawolintji lesasiwatsela.

⁴⁷ Nguleyondlela namuhla. Sifakele iMethodisti, iBaptisti, iPresbyterian imivini emVinini weliciniso, futsi siphila ngemandla aWo. Kodvwa lingeke litsele lutfo ngaphandle kwetivumokholo nelihlelo. Kodvwa uma lowo mVini uke waveta lelinye ligala, liyoba yinhlanganisela yemahlelo, leliciniswe ngaMoya loNgcwele, impela nje njengoba kwakunjalo ngeluSuku lwe—lwePhentekhosti; emuva ekucaleni. Amen.

Kuncono ngiyekele. Amen.

⁴⁸ Uma lowo mVini uke waveta lelinye ligala, liyoba njengoba lalinjalo ekucaleni. Sifakela tonkhe tinhlobo telibandla tivumokholo kuwo: iBaptisti, iMethodisti, iPhentekhostali, iPresbyterian, iLuthela, iBaptisti; futsi wonkhe utsela sitselo seBaptisti, sitselo seMethodisti, sitselo sePhentekhostali, nako konkhe lokunye. Kodvwa uma sekubuya, uma lowo mVini uke waveta lelinye ligala leliciniso, liyotsela sitselo saMoya loNgcwele. Amen. Uyo...

Batsi, “Yebo-ke, singemaMethodisti.”

“Kwakungesinjalo kusukela ekucaleni.”

“SingemaBaptisti.”

“Kwakungesinjalo kusukela ekucaleni.”

“SiyiPresbyterian.”

“Kwakungesinjalo kusukela ekucaleni.”

“Asikholelwa ekukhulumeni ngetilimi.”

“Kwakungesinjalo kusukela ekucaleni.”

“Asikholelwa ekuphiliseni kwaNkulunkulu ebandleni letfu.”

“Kwakungesinjalo kusukela ekucaleni.” Haleluya! Lesikudzingako namuhla yintfo letsite lebuyela ekucaleni futsi, ibuyele emuva ekucaleni. Haleluya!

Sikhatsi sami sesiphelile. Asikhuleke.

⁴⁹ Nkhosi Jesu, o, kwangatsi ngingaphila kutsi ngibone lolusuku libandla lelibuyla ngalo ekucaleni. Siphe kona, Nkhosi. Gewalisa lendzawo lencane manje ekuseni. Faka emandla lomelusi lomcane lapha, Nkhosi, nalaba labanye. Siphe inkhatimulo yaKho. Siphe umusa waKho. Siphe umhlangano lapha, Nkhosi.

⁵⁰ Asikhohlwe ngaletinye tintfo futsi sibuyele ekucaleni, ngoba siyati kutsi iNkhosi yetfu ikhulumma etinhlitiyweni tetfu manje ekuseni, “Susani lemivini lefakelwe laphaya. Tehlukanise nekungakholwa. Buyelani ekucaleni. Ngulapho labekunjalo khona.” Futsi, Nkhosi, sifuna yonkhe intfo ibe njalo kusukela ekucaleni.

⁵¹ Nkhosi, akutsi lwati lwetfu, uma singakaze sibe nalo namanje ekuseni...Uma akhona lohleti lapha longakaze abe nalololwati lwekucala lwaMoya, futsi watfola lowoMoya lofanako lowatfululwa ekucaleni, kungani sifanele sitsatse sibambiso na? Kungani sifanele sitsatse lokutsite lokubuhatsa na? Kungani kutsatsa lesilukhuni, lesibandzako, lesinemtsetfo, lesingakehluki sivumokholo, lapho tibhakabbaka temaPhentekhosti tigcwele tihloko lettingito na? Kungani nitsatse lokungena esikhundleni na?

⁵² Nkhosi, asibuyele emuva ekucaleni, futsi sikkwemukele njengoba benta ekucaleni, futsi sibe nemisebenti lefanako, tibonakaliso, timanga letitsela sitselo lesifanako: lutsandvo, kujabula, kuthula, kukhutsatela, kulunga, bumnene, bubele, kubeketela. Nkulunkulu siphe kona. Sive, Babe, ngoba sinikela lelibandla lelincane nalemvuselelo kuWe esandleni saKho, EGameni laJesu Khristu. Amen.

Nkulunkulu anibusise. Ngiyakutondza kutsi ngimele ngigijime, kodywa sekusemvakwensimbi yelishumi nakunye manje. Ngitonibona kusihlwa. Ngiyabonga... 

TINTFO LEBETINGESINJALO KUSUKELA EKUCALENI SSW61-0119M
(Things That Wasn't So From The Beginning)

LoMlayeto ngeMnaketfu William Marrion Branham, kwekucala wetfulwa ngesiNgisi ngaLesine ekuseni, ngenyanga yaBhimbidvwane 19, 1961, eAmerican Legion Hall eBeaumont, eTexas, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Loku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org